

KUSHTET PËR TË LICENCUARIN E NGARKUAR ME DETYRIMIN E SHËRBIMIT PUBLIK PËR SEKTORIN E GAZIT NATYROR NË SHQIPËRI

I. DISPOZITA TË PËRGJITHSHME

**Neni 1
Qëllimi dhe Objekti**

1. Këto rregulla/kushte kanë për qëllim të përcaktojnë dhe të sigurojnë shërbimin publik të furnizimit me gaz natyror nga i licencuari i ngarkuar me këtë detyrim që ushtron aktivitetin e transmetimit, të shpërndarjes dhe furnizimit me gaz natyror të klientëve të vegjël, përfshirë klientët familjarë, në mbështetje të parashikimeve të Ligjit Nr. 102/2015 “Për sektorin e gazit natyror”.
2. Shërbimi Publik i Furnizimit është një detyrim i shërbimit publik që i vendoset Furnizuesit të Shërbimit Publik, i cili siguron të drejtën e furnizimit me gaz natyror për klientët që përfitojnë nga shërbimi publik në Republikën e Shqipërisë, me një cilësi të caktuar të furnizimit, me çmime të rregulluara, lehtësisht dhe qartësisht të krahasueshme, transparente e jodiskriminuese, me qëllim mbrojtjen e tyre nga rritjet e paarsyetuara të çmimit duke synuar ne arritjen e një tregu konkurrues, të sigurt e të qëndrueshëm të gazit natyror nga pikëpamja mjedisore, pa qenë të diskriminuar në të drejtat dhe detyrimet e tyre siç parashikuar në Ligjin Nr.102/2015 “Për sektorin e gazit natyror”.

**Neni 2
Baza ligjore dhe ndërvlerësia**

1. Këto rregulla/kushte hartohen në mbështetje të Ligjit Nr. 102/2015 “Për sektorin e gazit natyror”, të ndryshuar, neni 23 pika f, dhe neni 92, pika 2; Ligjit Nr. 9902 datë 17.04.2008, “Për mbrojtjen e konsumatorëve”, të ndryshuar; Ligjit Nr. 9887 datë 10.03.2008, “Për mbrojtjen e të dhënave personale” të ndryshuar; VKM Nr. 533, datë 25.07.2019 “Për miratimin e kushteve dhe të procedurave për vendosjen e detyrimit të shërbimit publik, që do të zbatohen ndaj të licencuarve në sektorin e gazit natyror, të cilët ushtrorjnë aktivitetin e transmetimit, të shpërndarjes dhe furnizimit me gaz natyror”.
2. Kjo rregullore ka ndërvlerësi, interpretohet dhe zbatohet në përputhje me kuadrin ligjor në fuqi në tërësi, si dhe në veçanti me Kodet e Rrjetit për sektorin e gazit natyror.

**Neni 3
Termet dhe përkufizimet**

1. Të gjitha termet e përdorura në këtë akt normativ duhet të kuptohen dhe interpretohen sikurse janë të përcaktuara, në Ligjin Nr. 102/2015 “Për sektorin e gazit natyror”, të ndryshuar, Kodin e Rrjetit të Transmetimit dhe Shpërndarjes, si dhe në referencë dhe analogji të rregulloreve të miratuara nga bordi i ERE-s.
2. Çdo term i përdorur në këto rregulla për të cilin nuk ekziston një përkufizim sipas pikës së

mësipërme do të interpretohet në kontekstin dhe frymën e Ligjit Nr. 102/2015 “Për sektorin e gazit natyror”, të ndryshuar dhe akteve nënligjore të nxjerra në zbatim të tij.

II. DISPOZITA TË VEÇANTA PËR DETYRIMIN E SHËRBIMIT PUBLIK

Neni 4

Kushtet për vendosjen e detyrimit të shërbimit publik

1. Furnizuesi i ngarkuar me detyrimin e shërbimit publik të furnizimit është i detyruar të furnizojë klientet e gazit natyror në mënyrë proporcionale, qartësisht të krahasueshme, transparente dhe me çmime jodiskriminuese dhe të rregulluara, në të gjithë territorin e Shqipërisë si dhe duke iu referuar zonave, të cilat janë pjesë e planit rregullues, të miratuar sipas legjislacionit për planifikimin dhe zhvillimin e territorit.
2. Detyrimi i shërbimit publik ndaj një të licencuari vendoset nga ERE, në përputhje me legjislacionin në fuqi, në mënyrë transparente, jodiskriminuese dhe lehtësisht të verifikueshme, duke garantuar barazinë e aksesit për shoqëritë e gazit natyror të vendeve anëtare të BE-së ose palë kontraktuese të Komunitetit të Energjisë për klientët vendas dhe duke mos penguar hapjen e tregut të gazit natyror dhe të drejtën e furnizuesve të tjerë të gazit natyror për të furnizuar klientët në Republikën e Shqipërisë.
3. Duke qënë i ngarkuar me detyrimin e shërbimit publik të furnizimit si pjesë e detyrimit të shërbimit publik, Operatorët e sistemit të shpërndarjes së gazit natyror është i detyruar të furnizojë klientët fundorë sipas përcaktimeve të VKM Nr. 533, datë 25.07.2019 “Për miratimin e kushteve dhe të procedurave për vendosjen e detyrimit të shërbimit publik, që do të zbatohen ndaj të licencuarve në sektorin e gazit natyror, të cilët ushtrojnë aktivitetin e transmetimit, të shpërndarjes dhe furnizimit me gaz natyror”.
4. Detyrimi i shërbimit publik për të licencuarin vendoset duke vlerësuar kapacitetin teknik, financiar dhe organizativ të tij dhe duhet të marrë në konsideratë nëse i njëjti i licencuar po ofron shërbimin publik në të njëjtën zonë ose për një kategori konsumatorësh në momentin e vendosjes së këtij detyrimi. Vendimi për vendosjen e detyrimit të shërbimit publik duhet:
 - a) të përcaktojë qartë detyrimet që ka i licencuari;
 - b) të përcaktojë qartë të licencuarin e gazit natyror, të cilëve u është vendosur detyrimi i shërbimit publik, kur ky detyrim vendoset mbi një ose me shumë subjekte të licencuara, që ushtrojnë aktivitet në sektorin e gazit natyror;
 - c) të specifikojë natyrën e të drejtave ekskluzive ose të veçanta të caktuara për të licencuarin, duke arsyetuar se pse ato janë të nevojshme;
 - ç) të përcaktojë kategorinë e klientëve, territorin dhe periudhën për të cilët është vendosur detyrimi i shërbimit publik;
 - d) të shoqërohet me vlerësim në lidhje me tregun, cilësinë e furnizimit dhe qëndrueshmërinë;
 - dh) të identifikojë kostot e të licencuarit, ndaj të cilit do të vendoset detyrimi i shërbimit publik;
 - e) të përcaktojë një mekanizëm transparent dhe jodiskriminues për mënyrën se si do të mbulohen kostot, nëse kostot nuk mbulohen nga tarifa përkatese;
 - f) të bëjë të qartë financimin dhe kriteret për llogaritjen e mbulimit financiar që do të

përfitojnë të licencuarit, subjekte të këtij shërbimi publik.

Neni 5

Detyrimi i shërbimit publik të furnizimit

1. Detyrimi i shërbimit publik ndaj të licencuarve në sektorin e gazit natyror vendoset duke marrë në konsideratë interesin publik në ushtrimin e këtij aktiviteti, për kushtet që lidhen me:
 - a) sigurinë e furnizimit;
 - b) cilësinë e shërbimit;
 - c) tarifat për kryerjen e një detyrimi të shërbimit publik;
 - d) mbrojtjen e mjedisit;
 - e) mbrojtjen e konkurrencës;
 - f) efikasitetin e energjisë;
 - g) çdo rrethanë tjetër që ndikon në interesin publik;
 - h) ndryshimet klimaterike;
 - i) përdorimin e burimeve vendase të gazit natyror
 - j) furnizimin me çmim të rregulluar të gazit natyror të miratuar nga ERE;
 - k) mbrojtjen e shëndetit, të jetës dhe pronës së njerëzve;
2. Çdo detyrim i shërbimit publik, i vendosur nga ERE, do të përfshihet brenda 1 (një) muaji në termat dhe kushtet e licencës të të licencuarit. I licencuari, i ngarkuar me detyrim të shërbimit publik, duhet të marrë të gjitha masat, në mënyrë që të përmbushë detyrimet e shërbimit publik në përputhje me vendimin përkatës të ERE-s.

Neni 6

Furnizimi i gazit natyror me çmim të rregulluar

1. Detyrimi i shërbimit publik të furnizimit vendoset në mënyrë që klientët të furnizohen me gaz natyror nga furnizuesi i shërbimit publik, me çmime të rregulluara, që miratohen nga ERE në përputhje me nenin 92, të ligjit nr. 102/2015, “Për sektorin e gazit natyror”, dhe duhet të pasqyrojnë kostot e arsyeshme të shërbimit.
2. Çmimi i gazit natyror për sasi të ofruara do të jetë i rregulluar në përputhje me përcaktimet në pikën 5 të VKM Nr. 533, datë 25.07.2019 “Miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e gazit natyror, të cilët ushtrojnë aktivitetin e transmetimit, shpërndarjes dhe furnizimit me gaz natyror”.
3. Çmimi i gazit natyror me të cilin Furnizuesi Shërbimit Publik shet gazin natyror tek klientë që përfitojnë nga ky shërbim, do të përfshijë kostot reale të furnizimit me gaz natyror, duke përfshirë koston e investimeve të nevojshme, një normë të përshtatshme të kthimit të investimit, kostot e importeve, kostot e shërbimeve të furnizimit dhe të borxheve të këqija.

Neni 7

Rregullimi i furnizimit me gaz natyror

1. Furnizuesi i shërbimit publik duhet t'u ofrojë klientëve të cilët kanë të drejtën e shërbimit publik, shërbimin e furnizimit konform kushteve të përgjithshme të Kontratës Tip të furnizimit me gaz natyror për klientët fundorë që përfitojnë nga shërbimi publik i furnizimit miratuar me Vendimin e Bordit të ERE-s nr.166, datë 22.10.2020.
2. Furnizuesi, i cili ka detyrimin e shërbimit publik, duhet:
 - a) të sigurojë furnizim si një shërbim publik për të gjithë ata klientë fundorë që gëzojnë të drejtën nga ky lloj furnizimi;
 - b) të kryejë furnizimin në kuadër të shërbimit publik, ekskluzivisht, sipas tarifave të përcaktuara nga ERE, të cilat bazohen në kushte të rregulluara;
 - c) të ndërmarrë masa që të realizojë një furnizim të sigurt, të besueshëm dhe cilësor të këtyre klientëve fundorë, sipas kuadrit të shërbimit publik;
 - ç) të ndërmarrë masa për aplikimin e tarifave më të pranueshme të gazit natyror për furnizimin e klientëve fundorë, në kuadër të shërbimit publik, të cilat janë pjesë përbërëse e tarifave në bazë të kushteve të rregulluara.
3. Furnizuesi nuk duhet t'u devijojë kontratave standarte (ose Tip) dhe duhet të marrë përsipër të drejtat dhe detyrimet sipas kompetencave të tyre të plota.
4. Klientët familjarë, shoqëritë e vogla dhe, kur është e zbatueshme, klientët në nevojë, në bazë të nenit 90, të ligjit nr. 102/2015, "Për sektorin e gazit natyror", në vend që të transferohen te furnizuesit e mundësisë së fundit, furnizohen nga furnizuesi, sipas detyrimit të shërbimit publik, pa qenë nevoja e paraqitjes së ndonjë aplikimi të veçantë prej tyre, nëse furnizuesi i tyre ka dalë nga tregu i gazit natyror për shkak të rrethanave, jashtë kontrollit të tyre, dhe se klientët e sipër përmendur kanë humbur furnizimin me gaz natyror pa ndonjë formë mbrojtjeje, pavarësisht faktit nëse klientët në fjalë janë përballur me një dalje të paplanifikuar, të planifikuar apo për shkelje të rënda, nga ana e furnizuesit, në mospërmbushje të detyrimeve të tij.
5. Kontrata për furnizimin me gaz natyror për klientët fundorë, në kuadër të ofrimit të shërbimit të furnizimit publik, konsiderohet e lidhur në datën në të cilën furnizimi është bërë fizikisht, ku klientët në fjalë janë furnizuar, pavarësisht faktit nëse kanë bërë kërkesë apo jo, në përputhje me rregullat e zbatueshme dhe kushtet e parashikuara në rregulloren për ndryshimin e furnizuesit në sektorin e gazit natyror miratuar me Vendimin e Bordit të ERE-s Nr. 23, datë 30.01.2018.
6. Furnizuesi, i cili ka detyrimin e ofrimit të shërbimit publik, duhet t'i dorëzojë klientit fundor kontratën e lidhur me shkrim, brenda 8 ditëve nga dita në të cilën ka filluar furnizimi.
7. Furnizuesi i shërbimit publik duhet të mbajë një regjistër për numrin e klientëve të furnizuar prej tij dhe një regjistër të posaçëm me të çdo të dhënë të këtyre klientëve i cili duhet të përditësohet rregullisht dhe duhet ti komunikohet Operatorit të Sistemit të Shpërndarjes dhe ERE. Në faqen e internetit të ERE do të publikohen të dhënat që nuk shkelin parashikimet e ligjit " Mbi mbrojtjen e te dhenave personale" . Nr. 9887, datë 10.03.2008, ndryshuar.

Neni 8

Çmimi i rregulluar për furnizimin e klientëve të fundorë nga furnizuesi

i shërbimit publik

1. Furnizuesi i ngarkuar me detyrimin e shërbimit publik të furnizimit është i detyruar të furnizojë klientët e gazit natyror sipas përcaktimeve të pikës 5 të VKM Nr. 533 datë 25.07.2019 “Miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e gazit natyror, të cilët ushtrojnë aktivitetin e transmetimit, shpërndarjes dhe furnizimit me gaz natyror”, me cmime të rregulluara, në të gjithë territorin e Shqipërisë, në përputhje me këtë vendim.
2. Çmimi i gazit natyror i vendosur nga furnizuesi i shërbimit publik për kategoritë e klientëve të përcaktuara në nenin 92 të ligjit 102/2015 “Për sektorin e gazit natyror” caktohet nga ERE në përputhje dhe me metodologjitë e miratuara nga ERE.
3. ERE do të shqyrtojë mundësinë për të mbajtur çmimin e rregulluar si një masë të nevojshme për të siguruar shërbimin publik për klientët duke siguruar që kushtet e tregut të zhvillohen në atë mënyrë që klientët të cilëve iu është dhënë e drejta për shërbimin publik, mund ta blejnë gazin natyror në treg me çmime të arsyeshme të pa-rregulluara.
4. ERE duhet të publikojë Metodologjinë për llogaritjen dhe analizimin e çmimeve të rregulluara për klientët fundorë të shërbimit publik të gazit natyror.

Neni 9

Pagesa për të siguruar shërbimin publik

1. Pagesat për mbulim financiar, format e tjera të rimbursimit dhe të drejtat ekskluzive, të bëra për shoqëritë e gazit, për ofrimin e detyrimeve të shërbimit publik, bëhen në një mënyrë jodiskriminuese dhe transparente. Kostot e realizuara nga çdo i licencuar, për ofrimin e detyrimeve të shërbimit publik, pranohen si të justifikueshme kur tarifat për shërbimet e ofruara janë miratuar nga ERE, në përputhje me nenin 33 të ligjit 102/2015 “Për sektorin e gazit natyror”.
2. ERE do të vendosë për shpërndarjen e kostove të detyrimeve të shërbimit publik, të vëna në bazë të këtij neni, për klientët fundorë në një mënyrë jodiskriminuese dhe transparente.
3. ERE do të vendosë për shpërndarjen e kostove të detyrimeve të shërbimit publik, të vëna në bazë të nenit 89 të ligjit 102/2015, për klientët fundorë në një mënyrë jodiskriminuese dhe transparente. Kompensimi për këto kosto nuk duhet të kalojë shumën e shpenzuar për kryerjen e detyrimeve të shërbimit publik, të zbritura nga të ardhurat e fituara për ofrimin e shërbimit. Kompensimi mund të përfshijë një fitim të arsyeshëm. Çdo kompensim për të licencuarin për përmbushjen e detyrimit të ofrimit të shërbimit publik duhet të njoftohet dhe të marrë miratimin paraprak nga Komisioni i Ndhmës Shtetërore, në përputhje me legjislacionin për ndihmën shtetërore.
4. Në rast vendosjeje të detyrimit të shërbimit publik ndaj një të licencuari, të cilit i shkattohen kosto shtesë, që nuk janë përfshirë në tarifën e përcaktuar nga ERE, i licencuari do të kompensohet financiarisht apo në formë të tjera të rimbursimit dhe të të drejtave ekskluzive në përputhje me përcaktimet e pikave 9 e 10, të nenit 89, të ligjit nr.102/2015, "Për sektorin e gazit natyror", të ndryshuar.
5. Shpërndarja e kostove shtesë të detyrimeve të shërbimit publik, të shkaktuara ndaj një të licencuari, të vëna në bazë të këtij neni, do të vendoset nga ERE për klientët fundorë, në një

mënyrë jodiskriminuese dhe transparente.

6. Asnjë të licencuari nuk do t'i kërkohet të ndërtojë një rrjet në një zonë ku nuk ka rrjet në datën e hyrjes në fuqi të këtij ligji. Kjo bëhet pa paragjykuar detyrimin e Operatorit të Sistemit të Shpërndarjes për të lidhur klientët fundorë të rrjetit të tyre, sipas detyrimeve dhe kushteve të përcaktuara në këtë ligj dhe me aktet e tjera ligjore në fuqi.
7. Cdo investim i bërë nga shoqëria e transmetimit ose shpërndarjes, aksionet e së cilës kontrollohen plotësisht ose pjesërisht nga shteti, për kapacitetet e reja të transmetimit ose shpërndarjes, në funksion të plotësimit të kërkesës së klientëve që përfitojnë nga shërbimi publik i furnizimit, do të trajtohet si një detyrim i shërbimit publik në lidhje me sigurinë e furnizimit.
8. Kostot përkatëse mbulohen nëpërmjet tarifave të miratuara nga ERE, në bazë të një metodologjie që miraton ERE lidhur me përcaktimin dhe llogaritjen e tarifave të përdorimit të rrjetit të transmetimit dhe shpërndarjes së gazit natyror, duke pasur në konsideratë, por pa u kufizuar në, kriteret që kanë të bëjnë me:
 - a) aplikimin e metodës RoR (Rate of Return), që i lejon operatorit të rrjetit të mbulojë kostot e justifikuara;
 - b) vlerësimin e përcaktimit të kostove të rrjetit, që do të jenë ato aktuale, të amortizimit, të kthimit mbi kapitalin dhe të të ardhurave të zbritshme nga ato të lejuara sipas përcaktimeve përkatëse, që do të behen;
 - c) marrjen në konsideratë nga operatori i rrjetit vetëm të atyre kostove apo komponentëve të tyre që kanë të bëjnë me marrjen nga të tretët të shërbimeve të nevojshme për kryerjen e aktivitetit, njësoj sikur t'i kryente vetë ato, si dhe paraqitjen nga operatori i rrjetit të dokumenteve dhe provave për secilën nga këto kosto;
 - d) raportimin pa vonesë të rregullatorit nëse ndodhin shpenzime apo të ardhura të jashtëzakonshme.
9. Në kuadër të realizimit të veprimtarive të tyre, të licencuarit, subjekte të detyrimeve të shërbimit publik, deklarojnë ofrimin e shërbimeve të tilla, të cilat do të monitorohen nga ERE.

Neni 10

Klientët në nevojë

1. ERE mund të vendosë përsëri detyrimin e shërbimit publik për të siguruar shërbim publik me çmime të rregulluara për kategoritë e klientëve në nevojë të përcaktuara në nenin 97 të ligjit nr. 102/2015 "Për sektorin e gazit natyror" që përfitojnë nga shërbimi publik në të ardhmen, duke provuar që kjo masë është e nevojshme dhe e arsyetuar.
2. Klientët familjarë, që kanë fituar statusin e klientëve në nevojë, në përputhje me kushtet e përcaktuara në nenin 97, të ligjit nr.102/2015, kanë të drejtën e përfitimit të shërbimit publik të furnizimit. Furnizuesi, i cili është i ngarkuar me detyrimin e shërbimit publik, lidh, brenda 5 ditëve nga dita e regjistrimit të klientit në nevojë, të operatori i sistemit të shpërndarjes, kontratën për furnizimin me gaz natyror.
3. Të gjitha shpenzimet e bëra nga furnizuesi në lidhje me kushtet e veçanta të furnizimit për këtë kategori klientësh, gjatë një viti, të përcaktuar në pikën 4, të këtij neni, mbulohen nga

tarifat e atij viti. Në vitin pasardhës mund të bëhet rregullimi i te ardhurave në varësi të performancës së vitit të mëparshëm.

Neni 11

Detyrimi për lidhjen në rrjet

1. Operatori i Sistemit të Shpërndarjes është i detyruar të përmirësojë dhe të zgjerojë sistemin e shpërndarjes, me qëllim sigurimin e lidhjes së çdo klienti fundor, i cili nuk është i lidhur në sistemin e shpërndarjes, nën termat, kushtet dhe tarifat e vendosura nga ERE.
2. Operatori i Sistemit të Shpërndarjes siguron një shpërndarje të qëndrueshme dhe efikente të gazit natyror, në përputhje me kushtet e licencës dhe me rregullat e ERE-s
3. Pavarësisht nga detyrimi i percaktuar në pikën më sipër, Operatori/et i Sistemit të Shpërndarjes nuk do të ketë detyrimin për të ndërtuar apo zgjeruar sistemin e shpërndarjes në një zonë, në të cilën nuk ka ekzistuar rrjet para vendosjes së këtij detyrimi të shërbimit publik, përveç kur kërkohet nga rregulloret e miratuara nga ERE, sipas ligjit nr.102/2015, “Për sektorin e gazit natyror”, si dhe për zonat, të cilat janë pjesë e një plani territorial, kombëtar ose lokal, të miratuar në përputhje me parashikimet e legjislacionit specifik për planifikimin dhe zhvillimin e territorit.

Neni 12

Cilësia e shërbimit

1. Standardet e cilësisë së furnizimit, duke përfshirë kërkesat e nevojshme të vazhdimësisë së furnizimit në një nivel të qëndrueshëm të presionit nga furnizuesi shërbimit publik, të përfshira në rregulloret dhe kodet ekzistuese, do të konsiderohen detyrime të shërbimit publik.
2. Kushtet e cilësisë së furnizimit, të parashikuara në pikën më sipër, në lidhje me secilin prej të licencuarve, miratohen nga ERE, në përputhje me standardet evropiane të shërbimit të furnizimit, duke pasur në konsideratë, por pa u kufizuar në, kërkesat për:
 - a) sigurimin e shërbimit cilësor të transmetimit të gazit natyror, që lidhet me vazhdimësinë e livrimit dhe cilësinë e gazit natyror që hyn në sistemin e transmetimit dhe ruajtjen e cilësisë së tij deri në daljen nga sistemi;
 - b) hartimin e një metodologjie për standardet dhe monitorimin e cilësisë së gazit natyror në pikat e hyrjes dhe të daljes të sistemit të transmetimit, si pjesë e Kodit të Rrjetit të Transmetimit, të miratuar nga ERE;
 - c) monitorimin në vijimësi të cilësisë së gazit të transmetuar dhe dorëzimin pranë ERE-s të raporteve periodike, në përputhje me metodologjinë e aprovuar;
 - d) përcaktimin e vendndodhjeve të kontrollit të cilësisë së gazit;
 - e) marrjen e të gjitha masave për sigurinë e jetës së njeriut dhe parandalimin e aksidenteve të ndryshme, që mund të ndodhin gjatë transmetimit dhe shpërndarjes së gazit natyror.

Neni 13

Monitorimi dhe mbikëqyrja

1. ERE, duke vepruar brenda kompetencave të saj kryen monitorimin dhe mbikëqyrjen për zbatimin e termave e kushteve të licencës përkatëse për të licencuarin e ngarkuar me detyrimin e shërbimit publik për tregun e gazit natyror në Shqipëri.
2. ERE do të monitorojë vazhdimisht shfaqjen e praktikave kufizuese kontraktuale, përfshirë klauzolat e ekskluzivitetit, të cilat mund të parandalojnë klientët e mëdhenj të kontraktojnë në të njëjtën kohë më shumë se njëfurnizues ose të kufizojnë zgjedhjen e tyre për ta bërë këtë dhe informon Autoritetin e Konkurrencës për praktika të tilla.
3. Të licensuarit të cilët e shkelin kushtet e percaktuara si më sipër, do të jenë përgjegjës sipas dispozitave të nenit 106 të Ligjit nr 102/2015 “Për Sektorin e gazit natyror në Shqipëri”.
4. Jo me vonë se data 31 mars e cdo viti, furnizuesi i ngarkuar me detyrimin e shërbimit publik harton raportin vjetor, të cilin e dërgon për miratim në ERE, për veprimtarinë e furnizimit të realizuar si detyrim i shërbimit publik për vitin paraardhës.
5. Ky raport vihet në dispozicion të Këshillit të Ministrave dhe Sekretariatit të Komunitetit të Energjisë.
6. ERE informon Sekretariatit të Komunitetit të Energjisë për të gjitha masat e vendosura për përmbushjen e detyrimeve të shërbimit publik, sipas këtij vendimi, ndikimin e tyre të mundshëm në hapjen e tregut.
7. ERE njofton Sekretariatit të Komunitetit të Energjisë periodikisht, të paktën cdo dy vjet, për çdo ndryshim të kushteve për vendosjen e detyrimeve të shërbimit publik të miratuara nga Këshilli i Ministrave.

Neni 14 **Hyrja në fuqi**

Kjo akt nënligjor hyn në fuqi pas botimit në Fletoren Zyrtare.